

Baluwa jhubhele jha Petile Ulongolelo

Baluwa jhubhele jha Petile ilonge ijhandikwe na ntenga Petile, nambo akachomi twe bha ngohe bhajheketela jhe gheniya. Pange iwecha kubhehe mundo jhonge akanyandikile Petile baluwa jhenje. Jwajhandika ilonge jwenio akamwene Yecho kwa miho ghake patamita pannema pano achwa Yecho paghalambwika kumiho jhake, mu chula 1:17-18. Anda Petile ndi jwajhandika baluwa jhenje ibhonekana ajhandika pakibha ku Loma pakate jha muchaka cha makome nhwano ade makome chita na ticha kubhoke mu kubhelukwa kwa Yecho Kilichitu kabula Petile nakuwejhe. Kabhele Petile haikema baluwa jhenje, baluwa jhake jha ubhele, mu chula jha 3:1. Mana jhake ikajhandikwe badala jha baluwa jha kutumbula. Akaitehi baluwa jhenje imanyikane kwa bhando bhoha bhibhannyeketii Kilichitu.

Chikinkangita Petile kujhandika baluwa jhenje kwaleke mwojho bhibhannyeketii Kilichitu bhatame maha na kwakelebhuya bhakoto kukengama akabhola bhuwange, mu chula jha 2. Bhangajhokanikiya bhando bhibhalonge Yecho abhii na kiyoto kubhujha. Nambo bhannyokanikiya kubhehe Chapanga akwetejhe kiyoto nambo apala kila mundo aghombokoke, mu chula jha 3:8-9. Naha ndi chibhapala bhando bhatame kwa kunhalilalicha Chapanga, mu chula

jha 3:14.

Ghughabhii mukitabo

Petile ikichimulila jwenio kwa akachomi bhake, mu chula jha 1:1-2.

Kabhele abhakombochela bhando bhatame kwa kunhalalicha Chapanga nhwalo Chapanga atutei tutame yenio, mu chula jha 1:3-21.

Kubhoke peniya kwakelebhuha bhando bhabha miho na akabhola bhuwange na ilonge ipakwakolela akabhola bhuwange puupakupehekela nnema, mu chula jha 2:1-22.

Kabhele Petile ijhomolela kwaleke mwojho bhoha bhibhannyeketii Kilichitu bhatame kwa kunhalalicha Chapanga na kukilenganikiya kubhujha kabhele kwa Yecho Kilichitu, mu chula jha 3:1-17.

¹ Ne Simone Petile, natumiche na ntenga jwa Kilichitu.

Ninyandikila mangota mukwete kihobholelo chambone hake ngita chitukwete twenga kwa ndela jha Chapanga na Nkombola Yecho Kilichitu.

² Ninnyopelangana umbone na uteeke twe mu kummanyana Chapanga na Yecho Bhambo gwito.

Nkemitwe na kuhaghulilwa na Chapanga

³ Kwa uhotolo gwake gwa kichapanga, Chapanga atupii ilebhe yoha itupala tutame kunhobholela kwa kummanyana jwenio ndi jwatukemite tubhehe pamo mu ng'alicho na umbone gwake jwenio.

⁴ Kwa ndela jhene atupii lilaghano likolongwa na lyambone, ndi yatulaghila na kubhoke mu hupo yenie tuijhepe njwe tama mbajha ibhii mu nnema na kulombana na luhomo lwake lwa kichapanga.

⁵ Kwa nhwalo gwenio, nkangamale hake kwa kila ndela kujhonjekeya kihobholelo chino kwa umbone: Na umbone gwino nnyonjekeye kumanya;

⁶ mu kumanya kwino kujhonjekehe kukilongocha na kulongocha kwino nnyonjekehe luhimba na mu luhimba lwino nnyonjekeya kunnyinamii Chapanga;

⁷ na mu kinyinamila Chapanga nnyonjekeya upalo gwa kilongo na muupalo gwa kilongo nnyonjekeya upalo kwa bhando bhoha.

⁸ Anda mmi na ulombo gwenio ghoha gwamahele, naintenda kubhehe nkangamale na kujhambulila mu kumanya Bhambo gwito Yecho Kili-chitu.

⁹ Nambo mundo anda akwete jhe na chipwa jhenie, umanya atochikine miho ahoto jhe kulola kutale na alibhalile kubhehe ajhelewilwe uhakaho gwake gwa makacho.

¹⁰ Kwa yenio akalongo bhango, nkangamale hake kukemwa na kuhaghulilwa kwino na Chapanga, kubhehe kilebhe chakutamikii ughome gwino. Anda ntamingine yenie nagwengane ng'o mu kihobholelo chino.

¹¹ Kwa kuhenga yenio napokelelwa maha hake kujhingii muunahota nkolongwa gwa machiko ghoha ghangapeta gwa Bhambo na Nkomboche gwito Yecho Kilichitu.

¹² Yene nanyendelela kunkombochela machiko ghoha ilebhe yenio, pamo na kubhehe mwi-imanye na nkwimingine mu uchakaka ghumpokiline.

¹³ Ne mwene kilebhe chamaha, kunnekela mwojho na kunkombochela ilebhe henge kwa kipinde choha namela pannema.

¹⁴ Manyite kubhehe mandikii kuwe na kwileka yegha jhenje, anda Bhambo gwito Yecho Kilichitu chanongilila hotuhotu.

¹⁵ Yene mbaha ngangamale mbapa kuwegha ntole kughakombokela mambu ghanga machiko ghoha.

Tuwene ung'alicho gwa Yecho

¹⁶ Kipinde putummolita mangota malobhe gha makakala na kuhika kwake Bhambo gwito Yecho Kilichitu, tukakengimii jhe homo itungitwa na bhando bhibhakalamwike nambo twenga tukauwene ung'alicho gwa unahota nkolongwa gwake kwa miho ghito tabhete.

¹⁷ Nhwalo twenga tukibha pampila gheniya Chapanga Tate na ichima na ung'alicho. Lilobhe pilijhokanikika kubhoka kwa jwenio jwabhii na Ung'alicho Nkolongwa kulonge: “Jhonjo ndi Mwanango jhunimpahile, jawanganichwe nako.”

¹⁸ Kabhele twe twabhete ngatujhoina lilobhe lyenio kubhoka kunane kwa Chapanga patakibha pamo na jwenio panane jha kitombe cha nyahinyahi.

¹⁹ Kabhele lilobhe lya akalondole bha Chapanga libhii na uchakaka hake mu malobhe gha akalondole bha Chapanga kubhehe, mihenga maha anda

mulikamwii maha na kulihenge lihengo, nhwalo lilobhe lyenio lilandana ngita kolobohi jhilangala palubhendo ade lichiko lela pupakuchegha na lula lwa lundondwa lwa lukela pulupakung'ala mu miojho jhino.

²⁰ Kupeta kwa gheniya, mipalwa kumanya naha, abhii jhe mundo jwahoto kulonge ulondole ghubhii mu Majhandiko gha Chapanga ngita chapala.

²¹ Nhwalo ghabhii jhe malobhe gha ulondole ghighatendika kwa kupala mundo, nambo bhando ngabhapiita ulondole kubhoka kwa Chapanga kone bhalongwichwa na Uhuke gwa Chapanga.

2

Akabhola bhuwange

¹ Nambo makacho pakapitile akalondole bhuwange pakate jha bhando, ngita chiikibha kwa akalondole bhuwange na ndi chiipala kubhehe akabhola bhuwange bhibhapa kupitila pakate jhino. Bheniya nabhabhola kwa chile mabholo gheniya gha kuhangabhana ade kunkana Bhambo jwankombwile, yenio kwa ndela nabhakiletela kukomelekelwa kwa kupwitikilila bhene.

² Kabhele bhando twe nabhakengamila ndela yabhe ya hone, kutenda yenio mabholo gha Bhambo gha uchakaka naghaligwa.

³ Kwa tama yabhe mbajha nabhapata ulohe kwa kummola mangota homo yuwange. Nambo kubhoke makacho luhadabulo lwabhe

lutangichwe njwe na Jwapakwakomelekeya abhii miho!

⁴ Nhwalo akatumiche bha kunane kwa Chapanga pibhalemwita, Chapanga akakolii jhe kiya, nambo ngabhateghila pa mwotu gwangahimika kwenio bhatabhitwe minyololo mu lubhendo tyoo bhilendelela lichiko lela lya luhadabulo.

⁵ Chapanga aukolii jhe nnema kiya kwa gheniya, makacho paletita maheluko gha mache ku kilambo cha bhando bhangantembeke Chapanga, nambo Nuho ndi jwatangicha kwa bhando kupala bhatende ilebhe yukuhlalicha Chapanga, ngankombwila pamo na bhando bhange chaba.

⁶ Helahela Chapanga ngahadabila kilambo chuku Sodoma na ku kilambo chuku Gomola, ngatiniya mwotu ade kubhehe likitu ngaliu, ngabhekita kubhehe nnandanikiho nachakolela bhando bhangannyinamila Chapanga.

⁷ Chapanga ngankombwila Luto mundo jwaumbone jwahengita maha palonge jhake, ndi jwakibha ngolongonde hake kwa ngongola iteilwa na bhando bhibhatamita changabhehe na lilaghalikilo,

⁸ nhwalo mundo jwenio jwajheketilwa palonge jha Chapanga, atamita pakate jhabhe na kila lichiko kwa yaka twe akibha mu ngolongonde paghajhoha na kughalolokeya matendwa ghabhe ghanganandela.

⁹ Yene ndi chiibhile Bhambo abhamanyi chapala kwakombo bhando bhake kubhoke mu majhghanikilo, na chapakwabheka bhanganandela ade lichiko lela lya luhadabulo.

¹⁰ Achwa bhando bhibhankengama tama mba-jha ya payegha na kuupucha ukindendeke.

Akabhola bhuwange bheniya ndi bhina ngan-dango na kuloka bhiligha na bhiichimu jhe ipang-inwe, ibhii na ung'alicho gwa kunane kwa Cha-panga.

¹¹ Nambo ata akatumiche bha kunane kwa Chapanga bheniya bhibhabhii na uhotolo na makakala kupeta akabhola bhuwange, bhatakalila jhe bheniya ata kuiligha ihumbi yukunane palonge jha Bhambo.

¹² Bhando bheniya ukiligha kila kilebhe cho-choha changakimanya, bhilandana ngita inyama yangamalango, ubhelukwa na palonge upukilwa na kuchinjwa. Yene nabhakomelekelwa mu makomelekolo ngita bheniya,

¹³ nabhalepwa malagho kwa malagho ghala ghibhatehila kwa bhange. Kwabhe kuhananila ndi kuhenga chochoha chikihanganicha yegha yabhe, kabhele pakongoloho. Bhamba bhitenda ilebhe innete hone pimikongana mu lilongo lino pumulyegha mu minyagho jhino kongo bhaki-hanganila ndela yabhe ya kwakopokeya bhange.

¹⁴ Miho ghabhe ghatwelii ngongola, nambo bhikola jhe kutenda uhakaho. Bhahuta bhando akaleghelau bhajhingile mu mitambo. Miojho jhabhe iyobhalile tama jha uluhe, bhalapanikilwe na Chapanga!

¹⁵ Bhahilekite ndela jhinyokite, na bhachochomii nu kuikengama ndela jha Balaamo, mwana jwa Baole, jwenio jwapalita kupata uluhe kwa ndela jhanganandela.

¹⁶ Nambo Balaamo ngalakalilwa kwa nhwalo

gwa gwanganandela gwake, kipinde liponda lyake palongila kwa lilobhe lya mundo pauhibhikiya ngholoka gwa nnondole jwenio.

¹⁷ Akabhola bhuwange bheniya bhabhii anda chembwe chikijhomite, ngita mahunde ghigha-pogwa na kimbonga. Itamo ibhalenganikilwe ndi chehemo jhibhii lubhendo lukolongwa.

¹⁸ Bhilonge malobhe makolo hake gha kuloka ghachawana na kutumii malobhe gha tama mba-jha jha kiyegha kwajhonja bhando bhinnyeketii Kilichitu henahena ndi bhalekite kuhenga gwan-ganadela ghubhatehila bhando.

¹⁹ Bhilaghana nabhatawa jhe bhando bheniya bhibhajhonjite, kone bhene ndi akabhanda bha kuhenga ilebhe yanganandela. Nhwalo mundo ndi mmanda kwa kila kilebhe chochoha chikinon-gocho.

²⁰ Bhando bhibhapokonywikwe mundela jha ukomelekelo gwa nnema ghongo kwa kuumanya Bhambo na Nkomboche gwito Yecho Kilichitu, anda bhajheketile kujhonjwa na kulongochwa kabhele gwanganandela gwenio, ughome gwabhe naubhaha gwanganandela hake kuliku chiukibha makacho.

²¹ Ngaibhii mbaha ngabhahimanyite jhe ndela jhambone jha kunhalalicha Chapanga, kuliku kuimanya na kuileka na lilaghalikilo lya nyahinyahi libhapatite.

²² Chenje kilandana na lola luhomo lululonge naha, “Ghimbwa ubhujhila kulyegha chela chat-apike jwenio,” na lubhii luhomo longe lulonge naha, “Ligholobhe libhalijhohite libhujha kughal-abhuka kabhele mu mandakale.”

3

Lichiko lya kuhika Bhambo

¹ Akakoche bhango bhinimpahile, baluwa jhenje ndi jhuubhele kunnyakila mangota. Mu baluwa yoha ibhele nnyighite kujhimwuwa malango ghino gihoto kuwachila ghamaha ghanga ghinikombocha.

² Mbala nkombokela ilebhe ibhalongila makacho akalondole bha Chapanga bha Nyahinyahi na lilaghalikilo lya Bhambo na Nkomboche limpatita na akatenga bhino.

³ Nkombokela kubhehe machiko gha kupehekeya ghangano nabhahika bhando bheniya matyangilo ghabhe ghakengama tama yabhe yanganandela. Bheniya nabhantendela chanake,

⁴ bhilonge: “Alaghila nahika abhii kojhe! Ngohe abhii ko Bhambo jwenio? Akahoko bhito bha-jhomwike, kila kilebhe kibhii helenaha kubhoke kupanganwa nnema!”

⁵ Nambo bhando bheniya bhitenda kuponja kwane bhajhewite kubhehe makacho Chapanga akalongii kwenio kunane kwa Chapanga na pan-nema ngakupanginwa. Nnema ngaupanginwe kubhoke umache na kwa ndela jha mache,

⁶ na kwa mache gheniya, nnema ukakomelek-ilwe kwa maheluko gha mache.

⁷ Nambo kwenio kunane na nnema gwa ngohe ubhekwiwe kwa lilobhe lya Chapanga kwa nhwalo kwa kukomelekelwa kwa mwotu. Yane kwa nhwalo gwa lichiko lela bhando bhangannyinamila Chapanga nabhahadabulwa na kukomelekelwa.

⁸ Nambo akakoche bhango bhinimpahile, man-gajhewa kilebhe chimo! Kubhehe palonge jha Bhambo kibhii jhe chikilekenile pakate jha lichiko limo na yaka elufo kwa jwenio ghoha ghalen-ganile.

⁹ Bhambo akwete jhe kiyoto kulenganikila chela chalaghila ngita bhando chibhaholela kubhehe nabhujhajhe. Jwenio anhimbalila mangota, nhwalo apala jhe hilu jhumo pakate jhino ahobhelelela, nambo ipala bhando bhoha bhauleke uhakaho gwake na ang'alambukile Chapanga.

¹⁰ Nambo lichiko papaha kuhika Bhambo naibhaha ngita mwihe. Lichiko lyenie kunane kumahunde nakubhoka kwa kihindo kikolongwa hake, kila kilebhe chikibhii kunane kumahunde nakitiniwa mwotu, nnema nauhobholela na yoha ibhii mwono nahibhe jhe kabhele.

¹¹ Anda kila kilebhe nakihangabhanwa naha, bho, mangota namma bhando bha namuna ghane? Mipalwa kutama matamo gha nyahinyahi na kunnyinamila Chapanga,

¹² na kulendela lichiko lya Chapanga na kulitenda liike kajhombe. Lichiko lyenie kwenio kunane nakukomelekelwa kwa mwotu na kuhangabhanwa, na ilebhe yoha ibhii kwenio kunane naimwung'unyuka kwa mwotu.

¹³ Nambo akakoche bhango, twenga tulende lichiko lela lya Chapanga, tulende kunane kwa Chapanga kuhyono na nnema nhyono ndi itamo ya bhando bhibhanyinamila Chapanga.

¹⁴ Yene akalongo bhango bhinimpahile, nhwalo milendela lichiko lyenio, nghagha kukibheka

mbone mangabhehe jhe na malemwa palonge jha Chapanga na kutama nako teeke.

¹⁵ Mmanyangana kubhehe Bhambo gwito itenda kuhimbilila kipinde chamaha champela kupala nkombolelwe, ngita Pauli nnongo gwito jhutumpahile patujhandikila kwa malango ghapatite na Chapanga.

¹⁶ Gheniya ndi ghajhandike Pauli mu baluwa yake yoha panane jha mambu gheniya. Mu baluwa yake ibhii ilebhe henge inonopaho kuimanya na bhando akamandindilima, bhangabhehe na kitamo bhichimulila kinyume na chela chiijhandikwe ngita chibhatenda mu chehemo jhenge jha Majhandiko gha Chapanga. Yene bhakiletela makomelekelo ghabhe bhene.

¹⁷ Yene akalongo bhango bhinimpahile, nhwalo umanyingine njwe kilebhe chenje, mbaha muk- ilolekeye hake nkoto kukolowa na malemwa gha bhando na kugwegha na kuileka itamo hino ibhii nganganga.

¹⁸ Nambo nnyendelele kukola mu umbone na kumanya Bhambo na Nkomboche gwito Yecho Kilichitu. Ung'alicho ubhaha kwake, ngohe na ata machiko ghoha ghangapeta! Amina.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3